

明

史

明史卷一

本紀一

太祖

太祖諱元璋字國瑞姓朱氏先世家沛徙句容高祖伯六是爲德祖生四九爲懿祖四九生勑二自句容徙泗州是爲熙祖考世珍始居濠州鍾離之東鄉是爲仁祖子四太祖其季也初名興宗從軍時改後名以元天曆元年九月丁丑生前一夕妣陳氏夢神饋之藥有白光吞之寤猶聞香氣及產室有光燭天里人驚以爲火就視無有既長龍顏鳳目奇骨貫頂志意廓然有漢幾大度年十七值饑疫一月中考妣伯

兄皆歿貧無以殮里人劉繼祖與之地乃得葬投皇  
覺寺爲僧寺乏食散衆太祖西行求食道合肥病遇  
紫衣二人與俱護視甚至已忽不見乃適六安歷光  
固汝潁諸州凡三年復還皇覺寺當是時元順帝在  
位十九年矣綱紀弛替威令不行水旱災沴無虛歲  
民往往相聚爲盜有司不能制而帝日事淫樂且發  
丁民開河民益愁怨思亂汝潁間妖言交煽於是杜  
遵道劉福通奉韓山童起潁號紅巾軍李芝麻與其  
黨彭大趙具用起徐徐青輝起蘄黃僭稱帝國號天  
完而台州方國珍亦擁衆負固海濱其他據地相雄

將賈魯等圍濠州十三年五月魯卒濠州圍解張士誠據高郵六月太祖收兵里中得七百人子興署太祖爲鎮撫十四年太祖見彭趙輩暴橫不足共事乃以七百人屬他將獨與徐達湯和等二十四人南略定遠遇疾還少間請於子興往招驢牌寨降其兵三千人襲破元兵於橫澗山收健卒二萬七月下滁州彭趙招辭弗往而迎子興來滁十月元兵攻滁太祖倚澗設伏誘之伏發城中鼓譟出合擊敗之時元兵尚強乃具牛酒遣父老犒軍斂所獲馬還之告曰城中皆良民所以結聚備他盜耳將軍幸撫存之高郵

長者甚衆天下沟沟至正十二年壬辰二月定遠人  
郭子興與均黨孫德崖等據濠州元將徽里不花來  
攻怯不敢進日俘良民邀賞人不聊生太祖謀避兵  
卜玆於神去留皆不吉乃祝曰豪傑並起神欲吾舉  
事耶復投玆玆躍起卓立於地太祖喜遂以閏三月  
甲戌朔入濠守者執之見子興子興奇其狀貌與語  
大悅留爲親兵尋長十夫嘗與謀事戰輒勝乃以所  
撫馬公女妻之即高后也初德崖與子興有隙九月  
彭大趙均用爲元脫脫所敗奔濠德崖納之遂與均  
用執子興時太祖在淮北馳還救之乃得出是冬元

寇未滅奈何移兵戮良善乎元將信之遂引去十五年正月滁州糧匱太祖定計取和州拔之子興檄太祖總和州軍太祖慮諸將不相下秘其檄期旦日會時席尚右諸將先入解皆踞右太祖故後至就左及視事剖決如流衆稍稍屈已分工甃城期三日太祖工竣而諸將皆後於是始出檄南向坐曰奉命總諸公兵今後期如軍法何諸將皆惶恐謝遂下令搜軍中所掠婦女還其家民大悅元兵十萬來攻分屯新塘高望及鷄籠山太祖引兵擊破之元兵皆走渡江三月郭子興卒會韓林兒稱帝國號宋建元龍鳳都

亮檄子興子天敘爲都元帥張天祐右副元帥太祖  
左副元帥太祖方孤軍無援乃奉其正朔以令軍中  
五月謀渡江乏舟會巢湖帥廖永安俞通海等以水  
軍來附太祖大喜往收其衆時元中丞蠻子海牙扼  
巢湖諸隘口舟師出江路絕忽大雨水驟漲乃引舟  
從別港還和州因攻海牙敗之峪溪口諸將欲趨集  
慶太祖曰取集慶必先破采石采石重鎮備必固牛  
渚前臨大江彼難爲禦攻之必克六月引帆指牛渚  
常遇春奮戈先登克之采石兵驚潰諸將謀取資畜  
歸和州太祖謂徐達等曰今幸克捷當乘勝直前若

舍而歸再舉必難江東非我有矣令悉斷舟纜放急  
流中軍中大駭太祖曰太平近不取將奚爲乃自觀  
渡趨太平拔其城執萬戶納哈出總管靳義赴水死  
禮葬之改太平路曰府置太平興國翼元帥府太祖  
領元帥自是所下諸路皆改曰府諸要害地皆設元  
帥府守之元將阿魯灰絆住馬蠻子海牙以水軍扼  
姑孰口絕和州道陳堃先率數萬衆來攻太祖遣徐  
達鄧愈湯和迎戰別將潛師出其後夾擊之擒堃先  
使招其軍皆降阿魯灰等引去七月張天祐攻集慶  
弗克還八月陳堃先收餘衆屯板橋陰與元守臣合



九月丁亥長子標生復攻集慶陳瑱先誘殺張天祐  
郭天敘以叛太祖始專兵與戰於秦淮失利瑱先追  
之經葛仙鄉爲民兵百戶盧德茂所殺從子兆先領  
其衆十二月釋納哈出北歸元兵圍亳劉福通以韓  
林兒入安豐十六年二月蠻子海牙復扼采石太祖  
擊破之三月攻陳兆先於江寧鎮禽之降其衆進克  
集慶元御史大夫福壽戰死禮葬之召吏民諭之曰  
元失其政兵戈蠭起人莫自保吾舉兵來爲除亂耳  
其各安毋恐賢人君子吾禮用之吏毋貪殘殃吾民  
舊政不便者除之於是吏民交相慶辟用儒士夏煜

孫炎楊憲等十餘人改集慶路曰應天府當是時張士誠已據平江轉略浙西而江南北諸路未下者猶爲元守地相錯勢逼乃急遣徐達等取鎮江路克之徵元故侍御史秦從龍宋以郭天敘弟天爵爲中書右丞六月元帥鄧愈克廣德路移書張士誠不報七月宋置江南行中書省於應天以太祖爲平章政事總省事置官屬張士誠兵犯鎮江統軍元帥徐達敗之龍潭遂攻常州益以兵三萬攻久不下馳書責達等各降一官復益兵圍之九月太祖至鎮江謁孔子廟遣使告諭父老勸農桑置水軍於金山而還十七

年二月耿炳文克長興三月徐達克常州四月達及中翼大元帥常遇春引兵攻寧國太祖躬往督戰克之五月遇春遣將拔青陽天完將趙普勝敗去六月樞密分院判官趙繼祖克江陰七月鄧愈及元帥胡大海克徽州十月常遇春克池州元帥繆大亨克揚州十二月下令釋囚天完將明玉珍據重慶路十八年三月遣按察司僉事行所部錄囚鄧愈等克建德路於是應天有郡爲元守者皆下四月趙普勝陷池州天完將陳友諒據龍興路五月劉福通破汴梁迎韓林兒都之六月左副都指揮李文忠克浦江七月

郭天爵卒八月元杭州守將苗軍元帥楊完者死其部將員成以三萬衆降十月樞密院判胡大海克蘭谿徐達邵榮克宜興樞密同知廖永安爲張士誠將呂珍所執十一月置管領民兵萬戶府簡民間材勇令農時屯耕暇日講武食樞密院事胡大海攻婺州久不下太祖自將兵十萬以往十二月道徽州賜父老布帛召耆儒訪民事既至婺州元參政石抹宜孫遣將以戰車百兩自松溪援婺而自率萬人出緡雲太祖曰婺恃宜孫援破援兵則婺不攻自下松溪道惟彼以車戰適自取敗耳乃使胡德濟擊之梅花門

大破之城降置中書分省於婺州下令禁酒發倉賑貧民召儒士許元等分直講經史選富民子弟充宿衛曰禦中軍遣使招諭方國珍十九年正月方國珍遣使來聘鎮撫孫養浩報之三月釋州縣繫囚方國珍以温州台州慶元來附四月徐達遣樞密院判俞通海擊敗趙普勝於樅陽遂復池州宋進太祖儀同三司江南行省左丞相當是時都元帥耿炳文守長興鎮撫吳良守江陰統軍元帥湯和守常州皆數敗張士誠兵士誠不得逞太祖以故得以留婺徇浙東六月乃還應天八月元察罕帖木兒破汴梁劉福通

以韓林兒退保豐九月徐達擊敗趙晉勝克潛山  
陳友諒殺普勝常遇春克衢州遣使授方國珍福建  
行省平章政事十一月胡大海等克處州二十年二  
月元福建行省參政袁天祿以福寧來附三月徵劉  
基宋濂章溢葉琛至應天五月徐達常遇春敗陳友  
諒兵於九華山下閏五月友諒陷太平守將朱文遜  
院判花雲王鼎知府許瑗死之友諒弑其主徐壽輝  
自稱皇帝國號漢約張士誠合攻應天太祖患之諸  
將欲先復太平或請自將逆擊太祖曰太平固且彼  
居上流舟師十倍於我猝難敵也若自將迎之彼偏

師綴我而順流趨金陵半日可達吾旋師窮日而至  
百里趨戰愈非策也乃馳諭胡大海擣信州牽其後  
而令康茂才以書給友諒友諒遽引兵東下太祖命  
徐達陳於南門馮國勝常遇春伏兵石灰山側楊璟  
駐兵大勝港張德勝朱虎帥舟師出龍江關外而自  
總大軍盧龍山上偃黃幟山左赤幟山右令曰寇至  
舉赤幟諸軍接戰黃幟舉則伏起乙丑友諒舟師至  
大勝港璟禦之不得進却趨江東橋還至龍灣達萬  
人登岸樹柵勢銳甚時盛暑士卒流汗太祖曰天將  
雨姑就食當乘雨擊之須臾雲起雨大至舉赤幟諸

軍競前拔其柵友諒麾衆來爭戰方合雨止燧鼓舉  
黃幟伏盡起舟師並進夾擊大破之友諒輕舸遁降  
其卒二萬殺溺死無算徐達等追之遂復太平下安  
慶而大海亦克信州初太祖令茂才給友諒都事李  
善長以爲疑太祖曰不疾破此賊則二寇合吾何以  
支惟速其來先破之則士誠膽落矣已而士誠兵果  
不出置儒學提舉司以宋濂爲提舉子標受經學六  
月耿再成敗石抹宜孫於慶元宜孫死遣使祭之九  
月故天完將歐晉祥以袁州降十二月遣夏煜以書  
諭方國珍權酒二十一年正月宋進太祖爲太尉封



吳國公二月改樞密分院爲中書分省立鹽茶課置  
寶源局三月改樞密院曰大都督府元將薛顯以泗  
州降方國珍以金玉飾鞍來獻却之五月漢將李明  
道攻信州元帥夏德潤戰歿六月胡大海援信州執  
明道七月漢將張定邊陷安慶守將趙伯仲走還伏  
誅初太祖藉宋人障元兵及是察罕帖木兒破山東  
降田豐王士誠等軍聲大振八月遣使通好察罕而  
自將舟師伐漢克安慶長驅至小孤山漢將傅友德  
丁普郎來降進次江州友諒逆戰大敗走武昌遂入  
江州分徇南康建昌饒州蘄州黃州廣濟皆下其一

月漢將鄧克明以撫州降尋叛去張士誠將等伯昇  
攻長興常遇春救之伯昇遁十二月漢江西行省丞  
相胡廷瑞以龍興降二十二年正月太祖至龍興改  
龍興路爲洪都府築臺龍沙召父老諭曰爾民苦陳  
氏久今悉除去弊法其各事本業爲良民民大悅袁  
州瑞州臨江吉安諸路皆下獲鄧克明二月金華苗  
軍帥蔣英殺參政胡大海反郎中王愷死之樞密同  
僉李文忠遣兵馳救英降於張士誠處州苗軍帥李  
祐之聞英叛亦殺行樞密院判耿再成反都事孫炎  
知府王道同元帥朱文剛死之太祖發洪都叅知政

事鄧愈留守三月明玉珍稱帝於重慶國號夏降將  
祝宗康泰反陷洪都鄧愈走還應天知府葉琛都事  
萬思誠死之四月邵榮復處州李祐之自殺徐達復  
洪都祝宗走死獲康泰宥之五月大都督朱文正元  
帥趙德勝同鄧愈鎮洪都六月察罕帖木兒以書報  
留使不遣察罕尋爲田豐等所殺七月誅平章政事  
邵榮叅政趙繼祖八月漢陷吉安使其將饒鼎臣守  
之十月設關市批驗所稅商貨十五之一十二月朱  
文正遣兵復吉安饒鼎臣走元遣尚書張昶等齎宣  
勅授太祖江西行省平章政事太祖不受察罕將續

廓帖木兒致書歸使者且饋馬二十三年正月還都  
事汪河報之二月申命將士屯田積穀漢將張定邊  
等陷饒州張士誠將呂珍圍安豐三月太祖自將援  
之珍走迎宋主韓林兒居滁太祖還應天四月陳友  
諒大舉兵圍洪都諸全守將謝再興殺知州樂鳳叛  
附於張士誠五月築禮賢館以處名儒饒鼎臣復陷  
吉安參政劉齊知府朱叔華死之陷臨江同知趙天  
麟死之漢兵陷無爲知州董會死之七月洪都告急  
太祖自將舟師二十萬救之癸未次湖口分軍扼涇  
江口南湖背遏友諒歸路又調信州兵守武陽渡以

防奔軼友諒聞太祖來解圍逆戰丁亥遇於康郎山  
時友諒兵號六十萬艤艘高者十餘丈樓櫓如山聯  
亘數十里旌旗蔽空太祖分軍十一隊禦之戊子合  
戰殺傷畧相當而友諒驍將張定邊飛舸直犯太祖  
并舟適膠淺定邊大呼急攻衆惶遽殊死鬪而常遇  
春自他舟射却定邊俞通海來援舟疾水湧舟始脫  
鏖戰至暮乃罷夜遣徐達還守應天己丑友諒悉巨  
艦出戰仰攻之不利諸將多戰死右軍却斬隊長以  
示十餘人會風從東北起郭興請火攻乃以七舟實  
荻葦火藥其中外施旗播束草爲人被甲持斧隊旣

士操之前備走舸於後乘風縱火風大作波濤立  
火猛舟迅延燒其樓船百餘天水盡赤友諒兵大亂  
太祖麾軍鼓譟乘之斬首二千餘級焚溺死數萬辛  
卯復戰友諒復大敗棄旗鼓器仗蔽湖而下於是斂  
舟自守太祖數挑戰不敢出乃移軍左蠡據湖口相  
持三日復降二全吾將軍友諒益沮再移書諭之不  
荅而盡殺所獲戰士太祖乃盡遣其俘傷者療之祭  
其戰死者與博士夏煜等日草檄賦詩意氣愈壯八  
月壬戌友諒食盡趨南湖莆爲南湖軍所遏突出湖  
口太祖麾軍擊之順流而戰及於涇江涇江軍合擊

友諒中流矢死俘其子善兒降衆五萬張定邊以友諒次子理奔武昌九月還至應天論功行賞初太祖救安豐劉基諫不聽至是謂基曰我不當有安豐之行使友諒知我出乘虛搏應天大事去矣乃不攻應天而頓師南昌不亡何待漢亡天下不難定也遂自引軍征陳理張士誠自稱吳王十月軍圍武昌徇下湖北諸路十二月太祖還應天留參知政事常遇春督諸軍二十四年正月宋立太祖爲吳王置百官以李善長爲右相國徐達爲左相國常遇春俞通海爲平章政事諭之曰立國之初先正綱紀元氏（即德政）

荒令替遂至於亂此明鑒也將相大臣其務實稽法  
禮法立則人心定上下安矣立子標爲世子二月復  
如武昌陳理降發廩賑民召父老慰撫之民大悅  
漢沔荆岳皆下三月還至應天置起居注給事中罷  
諸翼元帥府置十七衛親軍指揮使司命中書省辟  
文武人材江西行省以陳友諒金鏤床進毀之四月  
祠死事諸臣丁晉郎等三十五人於康郎山趙德勝  
等十四人於南昌徐達圍廬州左君弼走安豐減商  
稅三十取一六月元湖廣安定宣撫使向思明來附  
七月克廬州常遇春會鄧愈等徇江西未附州縣八



月下吉安徐達按行荆湖諸路九月下江陵遂下夔  
陵潭州歸州十月遙授廖永安爲江淮行省平章封  
楚國公張士信侵長興耿炳文敗之十一月士信益  
兵圍長興湯和來援炳文夾擊大破之元慈利土官  
覃堂等來附十二月徐達克辰州衡州二十五年正  
月徐達下寶慶路及靖州湖湘平常遇春克贛州熊  
天瑞降遂進師南安招諭嶺南諸路下韶州南雄朱  
文正有罪太祖如南昌執之以歸廢居桐城二月元  
福建行省平章陳友定侵處州叅軍胡深擊敗之遂  
下浦城李伯昇圍攻諸全新城行省右丞李瑄德學

敗之四月常遇春徇襄漢五月克安陸下襄陽六月  
元思南宣慰使田仁智來附指揮朱亮祖會胡深攻  
建寧軍敗深死之課民計畝種桑麻木棉七月令士  
卒從渡江者守外郡被創廢疾者養之死者贍其妻  
子元思州宣撫使田仁厚以鎮遠古州來附九月置  
國子學夏人來聘都事孫養浩報之十月下令討張  
士誠太祖欲先翦士誠肘腋然後專意浙西乃命徐  
達常遇春等率師圍泰州閏十月克之十一月信州  
盜蕭明陷婺源知州白謙死之張昶傅巖爲叅知政  
事二十六年正月張士誠窺江陰太祖引軍救之至

鎮江士誠遁去康茂才追敗之浮子門太祖還應天  
二月元容美洞宣撫使田光寶保靖安撫使彭世雄  
鎮南宣慰使田昇玉等來附禁民種秫夏主明玉珍  
卒子昇立三月徐達克高郵四月夏人來聘徐達至  
淮安破張士誠將徐義水軍降其守將梅思祖於是  
士誠濠州守將李濟元徐宿二州守將陸聚皆以城  
降太祖如濠州省考妣墓崇其封置守戶二十賜故  
人汪文劉英等綺帛米粟召父老宴飲諭之曰吾豈  
一日能忘故鄉顧我不得久留此父老宜導子弟習  
勤儉敦孝弟濱淮尚有寇兵毋遽出父老各歸愛樂

餘年吾爲父老除租賦徐達克安豐元將忻都走追  
獲之竹昌左君弼奔汴梁五月至自濠下令求遺書  
七月楚國公廖永安卒於平江八月拓應天城作新  
宮鍾山之陽徐達爲大將軍常遇春爲副將軍率師  
二十萬討張士誠太祖集諸將誡曰毋殺掠毋壞室  
廬毋發丘壠士誠母葬閭門外毋侵毀其墓將帥務  
親睦毋縱左右虐軍士乃書戒約人給一紙遣之既  
而召問達遇春攻當何先遇春欲直擣姑蘇太祖曰  
不然湖州張天驕杭州潘原明爲士誠臂指士誠窮  
蹙彼必悉力赴援難以取勝今先攻湖州使疲於奔

命然後移兵姑蘇破之必矣因密誠曰熊天瑞降非  
本意今遣從行第聲言直擣姑蘇彼必叛而輸情如  
此足以誤士誠亦一助也師至太湖天瑞果叛降於  
士誠次湖州張天騏迎戰敗之李伯昇援湖州合力  
拒守因圍攻之士誠率師來援敗之皂林九月夏人  
來聘叅政蔡哲報之常遇春敗士誠兵於平望十月  
又敗之烏鎮十一月張天騏李伯昇以湖州降李文  
忠下餘杭潘原明以杭州降蔣英伏誅紹興嘉興皆  
下徐達等圍平江十二月陳友定將阮德柔以建昌  
降左丞廖永忠迎宋主韓林兒至瓜步沉之江以明

年爲吳元年建廟社祭告山川

吳元年春正月乙未諭中書省曰吾昔在軍中嘗空  
腹戰歸得粗糲甘如飴今乃珍食美飲其敢忘吾民  
太平應天諸郡吾創業地先勞供億其賜太平田租  
二年應天鎮江寧國廣德各一年辛丑令曰古人頌  
祝其君必寓警戒今所進箋表有頌無規非君臣相  
告以誠之道自今但令達意勿飾虛辭二月丁未擴  
廓帖木兒遣其將李二侵徐州指揮傅友德敗之三  
月丁酉頒文武科取士式夏五月己亥初置翰林院  
饒州知府陶安爲學士是月賜徐宿濠泗壽邳東海

安東襄陽安陸及自今新附土地徭賦三年久旱減  
膳蔬食六月丙午朔日有食之戊辰雨太祖曰雖雨  
傷禾已多其賜今年田租癸酉華朝賀女樂誅參知  
政事張昶秋七月丙子命府州縣正佐官之任者給  
其費賜綺帛有差父母妻長子皆有賜著爲令己丑  
雷震宮門獸吻赦獄囚庚寅遣使責方國珍貢糧八  
月癸丑園丘方丘社稷壇成九月甲戌朔太廟成參  
政朱亮祖率師討方國珍辛巳徐達常遇春破平江  
執張士誠傳詣應天吳地平士誠尋自殺熊天瑞伏  
誅戊戌遣使致書於元送其宗室神保大王等北還

辛丑論平吳功封李善長宣國公徐達信國公常遇春鄂國公及諸將士賜賚有差朱亮祖克台州方國瑛奔黃岩癸卯新宮成命博士熊鼎類集古人行事可爲鑒戒者書之壁書大學衍義於兩廡曰前代宮室多施繪采予書此備觀省愈於丹青矣冬十月甲辰朔遣起居注吳琳魏觀以幣帛求遺賢於四方乙巳徙蘇州富民實濠州丙午令百官禮儀皆尚左改李善長爲左相國徐達右相國辛亥祠元臣余闕於安慶李黼於江州壬子置御史臺以湯和鄧愈爲左右御史大夫劉基章溢爲御史中丞諭曰三大府總



天下政中書省政之本都督府掌軍旅御史臺糾百  
司皆紀綱重寄而臺察爲清要夫惟正己乃可律人  
勉之哉方國珍久未下癸丑湯和爲征南將軍僉大  
都督府事吳禎爲副往討之甲寅命中書省定律令  
戊午考正郊社廟祀雅樂庚申太祖將北伐謂徐達  
等曰中原擾攘山東則王宣反側河南則擴廓跋扈  
關隴李思齊張思道彼此嫌猜此亡元之藉也今北  
伐將何以決勝常遇春請直擣元都太祖曰元建國  
百年守備必固苟懸軍深入頓堅城之下餽餉不前  
援兵四集非我利也吾欲先取山東撤彼屏蔽旋師

河南翦其羽翼拔潼關而守之扼其戶檻天下形勝  
入我掌握然後進兵元都不戰可克鼓行而西雲中  
太原以及關隴可席捲而定矣諸將皆曰善甲子徐  
達爲征虜大將軍常遇春爲副將軍率師二十五萬  
北取中原平章胡廷瑞爲征南將軍江西行省左丞  
何文輝爲副將軍取福建湖廣行省平章楊璟左丞  
周德興叅政張彬取廣西告於上下神祇丙寅檄諭  
齊魯河洛秦晉燕薊之人己巳朱亮祖克温州十一  
月辛巳湯和克慶元方國珍亡入海壬午徐達克沂  
州斬元將王宣己丑平章廖永忠爲征南副將軍自

海道會湯和討方國珍甲午詣園丘世子從使歷觀  
於農家乙未初頒大統曆命自今以十月朔頒之辛  
丑徐達克益都十二月甲辰始頒律令丁未都督同  
知張興祖下東平充東諸路相繼降方國珍降浙東  
平己酉徐達下濟南胡廷瑞下邵武癸丑李善長率  
百官勸進表三上乃許之定有天下之號曰大明建  
元洪武戊午命湯和廖永忠自明州海道取福州甲  
子以羣臣推戴之意告於上下神祇庚午湯和克福  
州減金華田租

明史卷二

本紀二

太祖二

洪武元年春正月乙亥祀天地於南郊即皇帝位追尊四代考妣高祖曰玄皇帝廟號德祖妣胡氏曰玄皇后曾祖曰恒皇帝廟號懿祖妣侯氏曰恒皇后祖曰裕皇帝廟號熙祖妣王氏曰裕皇后考曰淳皇帝廟號仁祖妣陳氏曰淳皇后立妃馬氏為皇后世子標為皇太子以李善長為左丞相徐達為右丞相餘功臣進爵有差丙子追封皇伯考以下皆為王丁丑宴羣臣於奉天殿戊寅始居新宮辛巳以李善長徐

達等兼東宮官甲申遣使覈浙西田畝壬辰胡廷美  
克建寧庚子以鄧愈為征戎將軍將襄陽諸衛軍略  
南陽以北州縣湯和克延平執元平章陳友定傳詣  
京師斬之福建平天下府州縣官來朝是月定天下  
衛所之制二月壬寅朔定郊社宗廟典禮癸卯詔湯  
和由明州海道轉餉給北征軍命廖永忠為征南將  
軍朱亮祖副之浮海取廣東丁未釋奠先師孔子於  
國學仍遣使祭闕里戊申始祀大社大稷壬子詔復  
衣冠如唐制癸丑常遇春克東昌山東平甲寅楊璟  
下寶慶己未諭侍御史文原吉等曰日月之行猶有

薄蝕朕凡事安能盡善乃久不聞諫諍豈朕未能聽  
受耶其務盡言以舉乃職壬戌贛州指揮使陸仲亨  
會廖永忠征廣東庚午選國子生侍皇太子讀書三  
月辛未朔命儒臣修女戒壬申周德興下全州戊子  
命中書省給榜撫安山東所徵人材不願行者聽自  
便壬辰元左丞何真以廣州諸路降己亥徐達移兵  
河南至汴梁元將左君弼竹昌迎降夏四月辛丑朔  
蘄州進竹簞却之命四方毋妄獻廖永忠軍至廣州  
陸仲亨略定連州肇慶諸路來會廣東平丁未始祿  
享太廟戊申命繪古孝行及帝生平所歷艱難戰伐

事為圖以示子孫徐達常遇春大破元兵於洛水北  
元河南行省平章梁王阿魯溫降丁巳楊璟克永州  
甲子辛汴梁丙寅都督同知馮勝軍入潼關元將李  
思齊張思道遁遣使召勝令留兵守關五月己卯廖  
永忠下梧州庚寅帝至汴梁改汴梁為開封府六月  
庚子朔徐達等謁帝於行在諭達曰既克元都若元  
主北遁毋窮追但固疆圉防其侵軼壬寅躬祀開封  
諸神壬戌楊璟朱亮祖克靖江甲子陳友定故將金  
子隆等寇延平指揮蔡玉沐英擊破之戊辰命蘇州  
等九府及浙江江西運糧三百萬石於開封賑永新

水灾是月遣使祭元故平章察罕帖木兒秋七月戊子廖永忠下象州廣西平庚寅賑中原民老穉孤貧者辛卯徐達等自陳橋入辭諭之曰前代革命之際視若仇讐肆行屠戮朕實不忍諸將慎毋縱兵焚殺元之宗戚皆善待之內申帝發開封馮勝留守之丁酉京師永濟倉災閏七月庚子徐達軍下衛輝遂下彰德丁未帝至自開封徐達軍下廣平己酉次臨清諸將皆以師會徵天下賢才為府州縣官厚賜遣之壬子常遇春克德州癸亥徐達等大敗元兵於河西務丙寅入通州元主及其后妃太子夜出建德門北



走平章李文忠討金子隆獲之是日燭太平寧國廣  
德和滌旱災吳江水災田租八月己巳朔以應天府  
為南京開封府為北京庚午徐達軍入元都執其監  
國淮王帖木兒不花丞相慶童平章迭兒必失等斬  
之分遣將士巡古北口諸隘壬申以京師火四方水  
旱詔集耆儒議便民事可消天變者甲戌以張正常  
為真人革天師之號丁丑定六部官制劉基傅瓛罷  
己卯詔曰朕以布衣入戎伍思濟生民塗炭賴天之  
靈所向摧服重念推戴以來軍勞民敵賢人匿伏獄  
訟煩興供億不息朕寢食弗寧冀與天下更始罪無

輕重咸赦除之從征將士有司厚恤其家遁逃者得  
自首民間輸賦京師道里遠者官為轉運水旱為災  
所司具以實聞蠲其賦鎮江密邇京畿旱熯尤甚除  
今年秋租及明年夏稅荒田聽民耕墾復徭役三年  
闕里遣使致祭封衍聖公及曲阜知縣並如前代制  
懷才抱德之士隱岩穴者有司以禮聘致頃刑亂民  
往往用軍律中書省宜詳究務從中典決重囚待秋  
毋非時民間逋課悉除之蒙古色目人有才能者擢  
用收恤鰥寡廢疾不能自養者民年七十以上一子  
侍養其役諸利害所當興革詔書不載者有司明白

以聞命儒臣同刑官講唐律壬午改大都路曰北平  
府徵元故臣赴京師帝幸北京癸未詔徐達常遇春  
率師取山西湯和為偏將軍偕馮勝楊璟從征留都  
督副使孫興祖指揮華雲龍守北平賜長興安吉明  
年秋糧癸巳帝至北京甲午放元宮人乘輿服御物  
當飾金者代以銅九月壬寅置大都督分府於北平  
癸亥詔復求岩穴士乙丑常遇春下保定遂下真定  
冬十月戊辰朔帝發北京夏人來聘賀克元都庚午  
馮勝湯和下懷慶癸酉下澤州元兵來攻楊璟與戰  
於韓店敗績丙子命考正祀典丁丑至自北京馮勝

等下潞州戊寅以元都平詔天下戊子徙北平城中  
軍民於北京甲午司天監進元主所造水晶宮漏備  
極機巧帝曰廢萬幾之務用心於此所謂作無益害  
有益也不亡何待立毀之十一月己亥遣使分行天  
下訪求賢才勅天下有司凡災異以實聞庚子始祀  
上帝於圓丘戊午都督同知康茂才克河中丙寅命  
凡節序以薪米錢物給陣亡將士之家十二月丁卯  
朔山東行省參政汪廣洋大理卿劉惟敬為叅知政  
事楊憲為御史中丞徐達克太原擴廓帖木兒走甘  
肅己巳置登聞鼓於午門命御史引奏寃抑甲戌馮

勝克平陽丁亥築壇雞籠山祭故功臣胡大海等壬辰詔諭高麗安南優恤亡歿將士給其家月米

二年春正月庚子召元舊臣論元政得失馬翼進曰元得天下以寬得之亦以寬失之帝曰元季君臣耽於逸樂馴致淪亡其失在縱爾夫步急則躓弦急則絕聞寬則得衆不聞寬之失也甲辰浙江行省叅政蔡哲為叅知政事乙巳立功臣廟於雞籠山庚戌初遣使祭嶽鎮海瀆之神詔曰朕本淮右布衣因天下亂率衆渡江十有五年矣荷天眷祐戡定南服重念中原赤子未離塗炭用舉兵渡河齊魯之民歡然來

迎饋粟餉軍不辭千里朕思斯民當元末疲於供億  
今既效順何忍復勞之已賜元年田租天方旱熯民  
未蘇息其更賜一年頃平燕都下晉冀念其民數被  
兵困徵歛尤甚河南自歸附以來師旅所經未遑施  
惠今晉冀既平宜事軫恤西抵潼關北界大河南至  
唐鄧光息今年田租悉與除之有司更加撫存用稱  
朕意又詔曰朕肇丕基建都應天鎮江太平寧國廣  
德實股肱郡軍國所需供億煩重朕何日忘之去歲  
雖已賜租遭天旱惠不及下朕心缺焉其并滌和無  
為等州更賜今年田租乙卯詔諭日本占城爪哇西

洋諸國庚申常遇春軍至大同元將祝真棄城走賑  
湖廣饑是月倭寇山東濱海州縣二月丙寅朔詔修  
元史己巳占城入貢庚辰元丞相也速侵通州平章  
曹良臣拒却之壬午始享先農耕籍田三月丙申告  
禩廟曰去年四方災旱民命顛危今風雨不調凶稔  
未卜伏念皇考皇妣往時艱食取草雜米以炊艱難  
困苦其何敢忘今兒為民牧而災苦若此咎實在兒  
用自責艾具草蔬糲食與妻妾共食旬日示同民艱  
冀答天譴己亥徐達進取閩中師入奉元張思道遁  
賑閩中饑戶米一石又於孟津倉人給二石丙午常

遇春師至鳳翔李思齊奔臨洮辛亥唐州軍亂楊璟  
等還兵討之癸丑劉惟敬出為廣西叅政戊午廣國  
子學舍夏四月丙寅常遇春還軍北平討迤北餘寇  
戊辰汪廣洋出為陝西叅政楊憲山西叅政乙亥致  
元主書并諭納哈出徐達下鞏昌丙子賜秦隴諸州  
縣今年田租丁丑馮勝至臨洮李思齊降都督副使  
顧時叅政戴德克蘭州五月甲午朔日有食之遣使  
諭吐蕃丁酉徐達下平涼延安辛丑張良臣以慶陽  
降癸卯始祀地祇於方丘戊申張良臣叛癸丑蔡哲  
出為福建叅政辛酉詔凡時物先薦宗廟然後進御



是月追封淳皇后父陳公為楊王皇后父馬公為徐  
王建廟於太廟東六月己卯常遇春克開平壬午安  
南入貢封陳日煊為安南國王秋七月己亥常遇春  
卒於軍李文忠代領其衆辛亥擴廓帖木兒將韓札  
兒陷原州涇州辛酉馮勝擊走之丙辰夏人來聘八  
月癸亥臨祭常遇春喪於龍江甲子高麗入貢封王  
頤為高麗國王元將賀宗哲圍鳳翔丙寅元兵攻大  
同李文忠擊敗之癸未徐達克慶陽執張良臣斬之  
鳳翔圍解是月命儒臣纂禮書詔天下舉高潔博通  
之士至京師參考制度九月甲午賀宗哲寇蘭州馮

勝擊走之庚子製六寶辛丑召徐達湯和還留馮勝  
總軍事楊憲為中書右丞癸卯以臨濠為中都建城  
郭宮室如京師詔府州縣官三載考績甲寅製鐵券  
賜功臣乙卯吐蕃寇洮河指揮韋正降之冬十月壬  
戌朔遣楊璟諭夏人己巳山西叅政陳亮為叅知政  
事甲戌甘露降鍾山侍讀學士危素請告廟宣示史  
館不許癸未指揮同知丘廣為總兵官討上思州蠻  
乙酉翰林應奉雕祿為叅知政事辛卯詔天下府州  
縣皆立學是月復致元主書十一月乙巳有事於圓  
丘始奉仁祖配辛酉侯原善為叅知政事賑應天蘇

州諸府貧民人米一石布一疋十二月壬戌朔遣使諭占城安南毋相攻甲戌封阿荅阿者為占城國王甲申賑西安諸府饑己丑大賚平定中原及征南將士庚寅擴廓帖木兒寇蘭州指揮于光死之

三年春正月癸己復命徐達為征虜大將軍李文忠馮勝為左右副將軍鄧愈為左副副將軍湯和為右副副將軍分二道大將軍出定西征擴廓帖木兒左副將軍出居庸征沙漠庚子遣使祭安南高麗占城國內山川壬寅吏部奏官吏有罪者宜除僭虐諸州帝曰前代自僭虐為化外朕謂天下一家苟風俗未

醇宜擇良吏化道之可使罪人居耶辛亥太常卿胡  
惟庸為叅知政事丁巳西安鳳翔饑戶部請運粟賑  
之帝曰民旦暮待哺俟運粟死亡多矣遣使馳驛賑  
之戶粟一石二月壬戌帝行御苑見乳鵲嘆曰禽鳥  
劬勞若是况人乎命羣臣親老者得歸養乙丑詔續  
修元史庚午召浙西富民入見戒諭賜酒食丙子始  
朝日東郊癸未追封郭子興為滁陽王立廟滁州戊  
子詔求賢才可任六部者是月李文忠進兵察罕腦  
兒執元平章祝真三月庚寅朔賜應天等十六府州  
及河南山東北平今年田租是月陳寧罷遣使責日

本國王良懷入寇罪夏四月乙丑封皇子棖為秦王  
稠晉王棖燕王櫛吳王楨楚王樽齊王梓澤王杞趙  
王檀魯王從孫守謙靖江王丙寅置大宗正院徐達  
大破擴廓帖木兒於沈兒峪盡降其衆擴廓走和林  
庚辰置弘文院丙戌元主妥懽帖木兒殂于應昌子  
愛猷識理達臘嗣五月辛卯遣使訪歷代帝王陵寢  
丁酉詔舉學識篤行之士李文忠次開平元平章上  
都罕等降孫興祖等戰歿甲辰李文忠克應昌獲元  
嗣君子買的里八剌降其軍五萬餘人丁未大射戊  
申有事於方丘始奉仁祖配辛亥徐達下興元鄧愈

克河州甲寅慈利土司覃厓作亂楊璟敗走之丙辰  
除蘇州逋租三十萬餘石丁巳詔開國時將帥無嗣  
者祿其家久旱帝齋戒后以下親爨為農家食太子  
諸王饋於齋所六月戊午朔帝素服草屨步禱山川  
壇席藁曝烈日中夜露宿於地凡三日還宮仍齋居  
西廡辛酉賚將士省獄囚求天下通儒衛明治道者  
壬戌大雨甲子禁淫祠邪教壬申應昌捷至羣臣皆  
賀帝謂治書侍御史劉炳曰爾本元臣不當賀因命  
凡北征捷至嘗仕元者勿賀癸酉中書省以宣捷榜  
進帝覽之曰元有天下百年朕與若祖父皆賴養育

今其後失德用墜厥緒天之廢興於朕何有焉語多  
誇大非所以示四方其改爲之乙亥封買的里八剌  
爲崇禮侯丙子告捷於南郊汪興祖大敗元兵於大  
同北口禽擴廓帖木兒弟金剛奴丁丑告捷於太廟  
詔示天下戊寅詔諭雲南八番西域西洋瑣里瓜哇  
畏兀兒諸國賑漂水饑庚辰汪廣洋罷葬宋理宗頂  
骨於故陵元四大王寇大同武州太原指揮桑桂擊  
走之辛巳詔民間立義塚徙蘇州松江嘉興湖州杭  
州民無業者四千餘戶耕臨濠田給資糧牛種復其  
租三年增廣國子生員乙酉蠲灤州水災延安雹災

田租是月倭寇浙江福建濱海州縣吐蕃宣慰使何  
瑣南普等詣鄧愈降秋七月壬辰條政令可為定制  
者勒碑午門甲辰夏人以香楠來獻丙辰夏將吳友  
仁寇興元守將金興旺拒却之楊憲遷左丞尋以罪  
誅八月乙丑京師雨大水漂廬舍溺人民發廩賑之  
己卯始夕月西郊庚辰盜陷陵水諸縣官軍討平之  
乙酉寇中原暴骸是月詔諭吐蕃暹羅三佛齊淳泥  
真臘諸國京師及各行省始行鄉試九月丙申青州  
民孫古樸等作亂莒州同知牟魯遇害官軍討誅之  
壬寅廣東行省叅政周禎為御史中丞是月廣東叅



政李謙為叅知政事瓜哇西洋入貢冬十月丙辰朔  
詔延儒士更直午門為武臣說書賜畿內孤獨老疾  
者布人一疋賜文武官冬衣癸亥周德興為征南將  
軍討覃屋及諸洞蠻辛巳遣使遺元嗣君書十一月  
壬辰徐達李文忠師還勞之於龍江甲午告武成于  
郊廟丙申大封功臣進李善長韓國公徐達魏國公  
封常遇春子茂鄭國公李文忠曹國公馮勝宋國公  
鄧愈衛國公湯和等侯者二十八人下至軍士賜賚  
有差丁酉詔告天下戊戌大宴功臣帝曰朕與公等  
經營草昧艱難至矣今天下已定仍當以艱難守之

人情多謹憂患忽宴安不知憂患常始於宴安也願  
與公等相勉毋忘昔日己亥徐達等入謝帝從容語  
曰曩朕與卿等起鄉土本圖自全非有意於天下及  
觀羣雄所為無抹患之心反為生民患張士誠陳友  
諒尤桀黠張恃其富陳恃其強憑陵吳楚自謂莫敵  
朕獨一無所恃惟不嗜殺人布信義守勤儉而已賴  
卿等同心共濟故來者如歸人有言士誠逼近宜先  
擊之朕謂友諒剽而輕其志驕士誠狡而懦其器小  
志驕則好生事器小則無遠圖故友諒有鄱陽之役  
士誠不能出姑蘇一步以為之援向使先攻士誠則

姑蘇諸城并力堅守友諒必空國而來吾且兩受其  
敵朕所以取二寇固自有先後也二寇既除有事北  
方或言宜先平羣醜乃取元都公等又欲直擣元都  
兼舉隴蜀朕皆不謂然所以命先平山東次河洛者  
先聲既震幽冀自傾又度擴廓帖木兒張思道李思  
齊百戰之餘未肯遽降急之非北走燕則西走隴蜀  
併力一隅未易定也故出其不意反旆而北元人膽  
落不戰自奔然後西征張李望絕勢窮不勞而克惟  
擴廓猶力戰相拒向使未下燕都驟與角力彼人望  
未絕困獸猶鬪勝負未可知事勢與友諒士誠正相

反也諸將皆服設壇祭戰歿將士辛亥覈天下民數  
給民戶帖藏籍戶部有司歲計登耗以聞乙卯封汪  
廣洋為忠勤伯劉基誠意伯十二月癸亥復遣使遺  
元嗣君書并詔諭和林諸部甲子建奉先殿戊辰李  
謙出為廣東行省泰政封薛顯為永城侯居之海南  
庚午遣使祭歷代帝王陵寢壬申江夏侯周德興討  
平長沙洞蠻癸酉定府州縣官久任法己卯賜功臣  
田放元故臣老疾者還鄉壬午以日中數有黑子詔  
廷臣言得失

四年春正月丙戌李善長罷汪廣洋為右丞相胡惟

庸為左丞丁亥中山侯湯和為征西將軍周德興及  
德慶侯廖永忠為左右副將軍率舟師趨重慶賴川  
侯傅友德為征虜前將軍濟寧侯顧時為左副將軍  
率步騎趨成都以伐夏庚寅建郊壇太廟於中都祭  
郊發內府帛製冬衣加賜守邊將士丁未詔行省連  
試三年取士是月蠲諸暨水災東勝豐興旱災田租  
二月甲戌幸中都壬午至自中都元遠陽行省平章  
劉益以遠東降是月初行會試賜太平鎮江寧國今  
年田租三月乙酉朔策試天下貢士賜吳伯宗等百  
二十人進士及第出身有差丙戌改築圓丘方丘壬

寅竊庸施旱災田租乙巳徐達徙山後民九萬餘人  
戍北平丁未詔民間不得以醫祀三皇閏三月己未  
賜功臣守墳人戶辛巳河南叅政宋冕為叅知政事  
浙江叅政陳寧為御史中丞夏四月丙戌傅友德克  
夏階州己丑克文州都督同知汪興祖戰歿庚寅永  
嘉侯朱亮祖為右副將軍濟師伐蜀辛丑傅友德克  
隆州遂克綿州丙午徵山林隱逸及貢舉下第者辛  
亥靖州綏寧蠻亂江陰侯吳良往討之是月立元臣  
福壽祠五月丙寅元平章洪保保馬彥翬等殺遼東  
指揮同知劉益是月賜江西浙江秋糧六月壬午朔

傅友德克漢州辛卯廖永忠破瞿塘關遂入夔州癸  
巳宋冕出為江西按察副使戊戌夏將丁世真陷文  
州指揮僉事朱顯忠死之壬寅元右丞張良佐等殺  
馬彥輦執其黨以獻洪保保奔於納哈出癸卯湯和  
軍抵重慶夏主明昇降再徙山後民十九萬七千人  
於內地戊申倭寇膠州秋七月壬子命中書省勿奏  
祥瑞有災異立以聞辛酉傅友德下成都四川平壬  
戌命李文忠按行四川撫綏軍民庚辰綏寧蠻平丁  
世真圍秦州官軍擊破之世真為其下所殺八月癸  
巳淳泥入貢甲午賜臨濠淮安揚州秦滁蕪為今年

田租癸卯詔諭佛菰己酉賑閬中饑是月高州海寇  
作亂通判王名善不屈死雷州衛兵討平之九月庚  
戌朔日有食之是月三佛齊暹羅入貢冬十月癸巳  
日本入貢十一月丙辰真臘入貢應申命官吏犯贓  
者勿貸是月蠲西安鳳翔慶陽及睢祥符諸州縣旱  
災田租十二月辛巳以天下有司缺員詔今年鄉試  
中式舉人悉免會試錄用丙戌命工部尚書朱守仁  
廉察山東官吏辛卯大賚平蜀將士壬辰聽軍民採  
沿江蘆場宜春侯黃彬討贛州山寇平之  
五年春正月庚戌元兵寇汾州敗去壬子詔犯罪當



戊寅廣者屯田中都瑣里入貢癸丑遣待制王祿使  
雲南諭元梁王把匝剌瓦爾密甲子詔諭琉球乙丑  
徙陳理明昇於高麗甲戌以徐達為征虜大將軍李  
文忠為左副將軍馮勝為征西將軍分道出塞征擴  
廓帖木兒靖海侯吳禎督海舟轉餉遼東鄧愈為征  
南將軍周德興吳良為副將軍分道討湖南廣西諸  
蠻寇二月己卯朔潮州盜起陷揭陽潮陽指揮僉事  
王友討平之丙戌安南陳叔明弑其主日煜而自立  
遣使入貢却之壬辰京師火災三日三月戊申朔復  
應天府民勿事己酉詔武臣子弟入國學丁卯徐達

遣都督藍玉敗擴廓帖木兒於土剌河夏四月己卯  
賑濟南萊州饑戊戌詔行鄉飲酒禮庚子鄧愈遣營  
陽侯楊璟平澧州蠻五月壬子徐達兵至嶺北遇寇  
不利戊午久旱命宮中皆蔬食己未大雨是月詔曰  
朕起草野少不知書為治疎略以故民不加化尚染  
元俗天下大定禮儀風教其何可不講諸遺喪亂為  
人奴隸者即日放還貧民凍餒者里中富室資貸給  
養之孤寡殘疾官為賑贍鄉黨尚齒歲時宴會揖拜  
各依次序婚姻人倫之本毋論貨財務敦儉素喪事  
稱家有無勿惑風水停棺暴露戶丁田產不許護占

僧道齋醮男女混雜無別有司嚴治之閩粵豪強家  
奄割他人子驅使者即抵以罪六月丁丑遣吏部尚  
書趙孚堅賑山東饑戊寅馮勝等克甘州肅州進克  
亦集乃路追元岐王朶兒只班至瓜沙州而還甲申  
薊登州萊州旱災夏稅及逋賦復其徭役己丑賜京  
師民戶絹一疋癸巳定六部歲終考績法壬寅吳良  
平靖州蠻癸卯羽林指揮毛驥等緣海捕倭敗之於  
溫州甲辰作紅牌誡后妃李文忠敗蠻子哈剌章於  
阿魯渾河追至稱海而還宣寧侯曹良臣指揮使用  
頭等戰歿乙巳度四川田作鐵榜誡功臣是月賑萊

州慶陽東昌饑秋七月丙辰湯和及元兵戰於斷頭山不利指揮同知章存道戰歿是月竊開封及崇明水災大同徐州蝗災平涼鳳翔雹災田租八月庚辰竊海門水災田租壬辰命指揮以下以罪謫者悉錄用丙申吳良平五開潭溪古州諸蠻倭寇福寧元兵寇嶧縣指揮張祥被執甲辰元兵陷雲內州同知黃理死之九月丁巳吳禎驛送降臣高家奴等至京師帝謂羣臣曰昔元都平有勸即取遼陽者朕謂力不施於所緩威不加於所畏西北平定彼當自歸己而劉益果降今高家奴等繼至不勞寸兵然治亂倚伏

天運何常元君臣怠荒此輩遂為我臣僕卿等宜鑒  
前軌匡朕不逮勿以事小不言使朕忽於警戒也戊  
午周德興平焚鳳安田諸蠻壬戌聖壽節止羣臣勿  
賀自是齋居蔬食以為常冬十月戊子詔自今雜犯  
死罪可矜者輸作中都庚寅命諸晏國皆三年一貢  
高麗比年一遣使止聽貢所產布十疋丁酉賜應天  
太平鎮江寧國廣德秋糧十一月癸亥詔建公侯第  
宅於中都蠲青獻隆平旱災平涼雹災田租壬申盜  
陷同安指揮周淵擊斬之納哈出寇遼東十二月甲  
戌朔詔曰農桑衣食之本學校教化之原朕屢降條

章欲使民厚生善俗乃有司課績實政罔聞甚辜朕  
望自今計羣吏必書農桑學校之績不如制者罰之  
辛巳命百司所奏事皆啓聞皇太子甲申以天寒罷  
京師浚濠及中都工作庚子中官奏增肉飼虎命以  
虎送光祿他禽獸悉縱之烏思藏入貢為吐蕃所掠  
鄧愈為征西將軍討之壬寅琉球中山王入貢遣元  
嗣君書是年罷孟子配享孔子廟尋復之

六年春正月癸丑蠲金州復州旱災田租甲寅汪廣  
洋出為廣東叅政庚申命舉博通古今才德之士可  
為國子師者安南陳叔明奉表謝罪二月癸酉朔置

烏思藏朶甘衛指揮使司宣慰司等官丙戌賑揚州  
崇明饑戊子增國子學舍始令民養馬壬辰元兵寇  
永平乙未諭中書省曰科舉所得士多年少工文辭  
能以所學措諸行事者蓋寡非朕責實求賢之意科  
舉宜暫罷別令有司察舉賢才先德行次文藝使天  
下知所嚮風壬寅命御史及按察司考察有司元兵  
寇慶陽永平三月癸卯朔日有食之四川筠連州蠻  
叛成都指揮袁洪討平之照鑒錄成頒賜諸王乙巳  
置六科給事中戊申大閱壬子命徐達為征虜大將  
軍李文忠馮勝為左右副將軍鄧愈湯和為左右副

副將軍率師往山西北平脩邊甲子以指揮於顯為  
總兵官出海捕倭夏四月乙酉蠲甘泉膚施雹災田  
租己丑詔天下有司每遇閏歲圖山川險易以進壬  
辰賚中都軍士米人二石辛丑命吏部訪求賢才五  
月庚申元兵寇武朔諸州徐達遣臨江侯陳德華昌  
侯郭子興擊敗之甲子盜陷儋州廣東衛軍討平之  
六月辛未朔賚京衛軍士米人三石築京師城壬午  
盱眙進瑞麥薦諸宗廟壬辰擴廓帖木兒遣兵寇雁  
門指揮吳均擊走之是月都指揮使丁玉贊善馮冕  
為叅知政事蠲開封延安河間汾州旱蝗田租秋七



月庚戌增省府臺各官俸辛亥倭寇山東瀕海諸縣  
壬子以胡惟庸為右丞相陳寧為右御史大夫乙卯  
元兵寇白登大同軍擊走之己未祀戰歿指揮高茂  
等三十八人於功臣廟自是死事者皆祔乙丑侍御  
史商嵩為御史中丞己巳朶兒只班等寇河蘭二州  
西寧衛軍擊走之是月賑延安饑蠲和州胙城旱災  
田租八月乙亥建厯代帝王廟於京師賜指揮戰歿  
者公田癸未元將普賢奴等陷保德河曲太原千戶  
馮銘等復之己丑大同指揮王約襲破元兵於神仙  
寨執其平章定定辛卯徐達徙朔州邊民於內地是

月嶺華臨潼諸州縣蝗災田租九月庚子詔畿內及  
浙江江西今年秋糧皆輸布給邊乙卯命諸司重事  
奏聞常事啓皇太子是月賑寧晉樂城棗強饑冬十  
月丙子徙山西邊民於中都辛巳召徐達馮勝還留  
李文忠於山西脩邊十一月己酉占城來獻安南捷  
遣使諭令罷兵壬子徐達馮勝還至代縣聞擴廓帖  
木兒兵至大同旋師與李文忠擊敗之丁巳田州饑  
賜以牛種仍蠲稅二年己未潞州貢人參詔止之謂  
省臣曰往年金華貢香稻朕止之遂於苑中種數十  
畝觀其耘穫以自通計所入亦足供用朕飲無多太

原歲進葡萄酒今並令勿進朕豈以口腹累人哉甲子遣尚書劉仁等賑真定饑仍蠲其租丙寅冬至帝疾改卜郊於閏月閏十一月乙亥詔錄功臣早世恩未及嗣者庚寅重定大明律壬辰元四大王寇岢嵐州十二月戊戌詔天下府州縣止留寺觀一區僧道皆併處之女子年未四十不得為尼癸卯元兵寇撫寧及瑞州詔廢瑞州徙其民內地庚申浚開封清河辛酉待制王禕遇害於雲南

七年春正月庚午賑松江水災甲戌吳禎巡海捕倭壬午賚北平河南山西湖廣諸衛軍士二月丁酉朔

日有食之戊戌西天阿難功德國入貢是月蠲濟南  
蝗災平陽太原汾州汲旱災田租三月庚寅賑嘉定  
饑夏四月戊戌進丁玉為右丞藍玉等拔興和獲元  
國公帖里密赤等甲辰李文忠遣將分道出塞獲元  
平章陳安禮太尉伯顏不花等丙辰命馮勝鄧愈湯  
和郭子興鎮北邊戊午汪廣洋為左御史大夫五月  
己巳賜蘇州松江嘉興諸府夏稅壬申高麗貢表誤  
却其貢賜書責之癸酉侯原善復為叅知政事辛巳  
賑蘇州饑貸牛種久不雨是月大雩乃雨六月壬子  
蠲陝西通租戊午汰北方府州縣冗官壬戌撤里畏

元兒入貢是月薨真定保定河間順德懷慶平定樂  
安蝗災平涼延安鄜靖寧雹災田租秋七月甲子朔  
李文忠克高州大石崖斬元宗王朶朶失里遣將至  
纒帽山斬魯王壬申倭寇膠州甲戌寇海州衛軍擊  
敗之八月甲午朔始躬祀歷代帝王廟辛丑詔曰朕  
起布衣定禍亂思軍士為朕効死戰陣白骨暴原野  
魂無所依親老子幼莫能存活民經兵亂骨肉携離  
不得復聚皆朕之過凡戰歿及已故守邊將士父母  
妻子有司具以名聞官為存養仕宦遠方卒于官妻  
子不能歸及流移人民欲還本籍者並資送之乙卯

增列侯諸功臣祿秩丙辰李文忠追擊元兵於豐州  
敗之丁巳構屋龍江養貧民廢疾者庚申賑河間廣  
平順德真定饑九月丁丑遣買的里八剌北還遣元  
嗣君書冬十月己未詔軍婦守節不嫁者官養贍之  
終身十一月壬戌朔納哈出寇遼陽丙寅詔獄囚註  
誤過失因人致罪者宥之壬午召官吏謫田鳳陽者  
五百餘人錄用有差十二月戊戌蠲開封水災田租